



Temperaturas fraidas tar l'apéro da Bumaun da Grischun Vacanzas a Cuira, persuerter discussiuns plain fieu e flomma. FOTOS G. N. STGIER

«Nagina relaziun cun il sport d'enviern»

Grischun Vacanzas: Apéro da Bumaun

DA GION NUTEGN STGIER / ANR

■ **Fixar prioritads prudentas ed esser vinavant innovativ, quai saja er en l'avegnir indispensabel per il turissem grischun. Marcel Friberg, il president da l'organiziun tetgala dal turissem da noss chantun, fa gronds quitads che 50% da la generaziun giuvna en il Grischun ha strusch ina relaziun cun il sport da naiv.** En noss chantun avain nus strusch ina occurrenza ch'attira uschè blera prominenz sco l'apéro da Bumaun da Grischun Vacanzas. Er ier è stada da la partida la «crème de la crème» dal Grischun per sa laschar ir bain cun rosoli, vin alv e da tuttas sorts piculezzas da mangiar. Persunas da num e pum da l'entir chantun èn vegnidas en il curtin da l'hotel Marsöl a Cuira per far in viva sin il nov onn. En il center da quel stattan anc adina las festivitads da 150 onns turissem d'enviern en il Grischun e cunzunt en l'Engiadina han lieu numerus events per quel giubilium radund. A pled tar quel apéro da Bumaun è er vegnì il nov cusseglier guvernativ e schef dal departament d'economia publica, *Jon Domenic Parolini*. El ha ditg als preschents d'avair er en l'avegnir avunda curasch, esser adina ac-

tivs e cunzunt er averts quai che pertutga ils resultats. Per avair er en l'avegnir success, sco avant 150 onns ils pioniers dal turissem, dastga betg mancar la creativitat. Fixar prioritads prudentas ed esser vinavant innovativ, quai saja er en l'avegnir indispensabel per il turissem grischun, ha ditg il nov cusseglier guvernativ da Scuol. La politica haja da procurar per bunas cundiziuns da basa e cunzunt er per damain birocrazia per ils purtaders dal turissem.

Betg mo en ils centers

Sa drizza a la raspada illustra è lura er *Marcel Friberg*, il president da Grischun Vacanzas. A l'entschatta da ses pled ha il Sursilvan cunzunt ludà las pendicularas grischunas che hajan fatg lavur excellenta en curt temp per porscher als numerus giasts pistas optimalas tiers la pauca naiv. La colliaziun dal territori da skis da Lai cun Arosa saja per il turissem grischun er stà in punct culminant il 2014. Er il giubilium da 125 onns Viafier retica haja contribuì blier per noss turissem, ha menziunà Marcel Friberg. Oz pretendia il giast qualitad ed innovaziun e be per il capricorn vegnia strusch anc insatgi en noss chantun. Quitads fa al president da Grischun Vacanzas la realitad che 50%

da noss scolars en il Grischun han strusch ina relaziun tar il sport da naiv. «Quai è dal reminent betg mo il cas en ils centers, mabain er en las valladas sco la Surselva u autras regiuns», manegia Marcel Friberg. Betg mo tar il ir cun skis, mabain er tar il hockey ubain il snowboard hajan oz deplorablmain numerus uffants nagina relaziun.

In tema è segir er l'olimpiada

Ils uffants èn simplamain betg sche integrads pli en quels sports d'enviern sco quai che nus eran, ha ditg l'um da Breil. Cuntent è Marcel Friberg er che daplis Svizzers vegnan puspè en il Grischun cun avair rinforzà Grischun Vacanzas il marketing en Svizra ed er en Germania. «A nus spetga dentant tuttina anc blera lavur per persvader ils Svizzers da far vacanzas en las muntognas ed en spezial en il Grischun, menziuna il Sursilvan. Qua è avant maun in grond volumen e da quel avessan er nus da savair profitar. In tema vegn er ad esser per Marcel Friberg danovamain l'olimpiada en il Grischun per exempel cun Turitg. Lura avessan nus eventualmain pli spert la colliaziun directa cun l'eroport, ha ditg Marcel Friberg.



Trais Engiadinais: (da san.) Dur Campell, Jon Domenic Parolini ed Urs Wohler.



Marcel Friberg (san.) il president da Grischun Vacanzas cun Alois Vinzens, il director da la Banca chantunala.



Deputada Silvia Casutt cun Giovanni Netzer, l'intendant da l'Origen Festival Cultural.



Il president dals hoteliers svizzers, Andreas Züllig (san.) cun Gaudenz Thoma, il president da Grischun Vacanzas.



Deputà Remo Cavegn, cusseglier guvernativ Christian Rathgeb e l'anterior cusseglier guvernativ Reto Mengiardi (da san.).



Margrit Darms, deputada da la Surselva, e Jon Pult, deputà da Cuira.